



*Sabtu, 24 Juni 2023*

**Ogen : Rut 1:1-2**



**Tandang**



**P**indah sada ingan ku ingan sideban, e me tandang ku kuta sideban, si labo inganta tading ndube. Kalak tandang enda beda ras kalak si mantek kuta. Semalna kalak tandang arus nggit eradaptasi ras inganna tandang e. Melala si arus man pelajaren dinging si arus iperdiateken; budaya, bahasa, kebiasaan geluh ras sidebanna. Alu kata sideban banci sikataken geluh kalak tandang labo mesunah.

Naomi sekalak ndehara Elimelek tandang ku Moap erkiteken jadi kelehen si mesangat i kutana. Perbeben enda me si erbahansa ia jadi kalak pertandang. Tandang alu kemusilen si lit sabap kutana lanai teringanisa. Bagem igengken tading i bas kuta kalak, janah jadi kalak asing dinging kelas nomor dua (bas paksa si e kalak tandang kurang iergaken). Situasi sulit enda la erbahanca Naomi kelsehen, tetap ia ikut ras perbulangenna. Anak-anakna pe ikut rassa ku kuta inganna tandang e me Mahlon ras Kilyon. Inegri Moap me ia tading jadi kalak petandang.

Bagem kegeluhenta pe bas doni enda. Kai pe la lit si tetap. Banci jadi geluhta pe bali bagi kegeluhen Naomi enda, sung i bas kecukupen janah banci ka salih jadi kiniseran. Geluh enda dem perubahen, janah meter kal perubahen e jadi. Si mada taneh jadi petandang, bayak jadi musil, sehat jadi sakit ras sidebanna. Uga gia kecibal sinidalani kita i bas paksa enda erlajar arah Naomi; tetap setia ngikut ras perbulangen, mabai anak-anakna ikut rassa. Naomi nggit erdame ras situasi si mbaru, aminna pe sulit janah nggit ia iproses i bas kecibal si mbaru e.